



An Bhruiséil, 25 Meitheamh 2026
(OR. en)

9977/26
ADD 1

Comhad Idirinstitiúideach:
2026/0151 (NLE)

COPEN 208
EUROJUST 20
JAI 703

TOGRA

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	25 Meitheamh 2026
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2026) 283 annex
Ábhar:	IARSCRÍBHINN a ghabhann leis an Togra le haghaidh Cinneadh ón gComhairle maidir le síniú Comhaontaithe idir an tAontas Eorpach agus Daon- Phoblacht Dhaonlathach na hAilgéire maidir leis an gcomhar idir Gníomhaireacht an Aontais Eorpaigh um Chomhar Ceartais Choiriúil (Eurojust) agus údaráis Dhaon-Phoblacht Dhaonlathach na hAilgéire atá inniúil ar chomhar breithiúnach in ábhair choiriúla

Gheobhaidh na toscaireachtaí i gceangal leis seo doiciméad COM(2026) 283 annex.

Faoi iamh: COM(2026) 283 annex



AN COIMISIÚN
EORPACH

An Bhruiséil, 25.6.2026
COM(2026) 283 final

ANNEX

IARSCRÍBHINN

a ghabhann leis an Togra le haghaidh

Cinneadh ón gComhairle

**maidir le síniú Comhaontaithe idir an tAontas Eorpach agus Daon-Phoblacht
Dhaonlathach na hAilgéire maidir leis an gcomhar idir Gníomhaireacht an Aontais
Eorpaigh um Chomhar Ceartais Choiriúil (Eurojust) agus údaráis Dhaon-Phoblacht
Dhaonlathach na hAilgéire atá inniúil ar chomhar breithiúnach in ábhair choiriúla**

IARSCRÍBHINN

Téacs caibidlithe deiridh idir an tAontas agus an Ailgír 3.2.2026

Dréacht-Chomhaontú

idir

Daon-Phoblacht Dhaonlathach na hAilgéire agus an tAontas Eorpach maidir le comhar breithiúnach in ábhair choiriúla idir údaráis inniúla na hAilgéire agus Gníomhaireacht an Aontais Eorpaigh um Chomhar Ceartais Choiriúil (Eurojust)

TÁ DAON-PHOBLACHT DHAONLATHACH NA hAILGÉIRE, dá ngairtear ‘an Ailgír’ anseo feasta,

agus

AN tAONTAS EORPACH, dá ngairtear ‘an tAontas’ anseo feasta,

dá ngairtear ‘na Páirtithe’ go comhpháirteach anseo feasta,

AG FÉACHAINT d’fhorálacha ábhartha an Chomhaontaithe Comhlachais idir an Ailgír agus an tAontas¹,

AG FÉACHAINT d’Ordú Uimh. 66/155 an 8 Meitheamh 1966, arna leasú agus arna fhorlíonadh, lena mbunaítear Cód Nós Imeachta Coiriúil Dhaon-Phoblacht Dhaonlathach na hAilgéire,

AG FÉACHAINT DO Dhlí Uimh. 18/07 an 10 Meitheamh 2018 ó Dhaon-Phoblacht Dhaonlathach na hAilgéire maidir le daoine aonair a chosaint i bpróiseáil sonraí pearsanta, arna leasú agus arna fhorlíonadh le Dlí Uimh/25 an,

AG FÉACHAINT DO Rialachán (AE) 2018/1727 ó Pharlaimint na hEorpa agus ón gComhairle an 14 Samhain 2018 maidir le Gníomhaireacht an Aontais Eorpaigh um Chomhar Ceartais Choiriúil (Eurojust), agus a ghabhann ionad Chinneadh 2002/187/CGB ón gComhairle agus lena n-aisghairtear an cinneadh sin² (dá ngairtear ‘Rialachán Eurojust’ anseo feasta),

I bhFIANAISE leasanna na hAilgéire agus an Aontais araon maidir le dlúthchomhar dinimiciúil breithiúnach a fhorbairt in ábhair choiriúla idir údaráis inniúla na hAilgéire agus Eurojust chun aghaidh a thabhairt ar na dúshláin a bhaineann leis an gcoireacht thromchúiseach, go háirithe an choireacht eagraithe, an sceimhlitheoireacht, an t-éilliú, sciúradh airgid agus an chibearchoireacht, agus cearta bunúsacha agus saoirsí bunúsacha daoine aonair á n-áirithiú ag an am céanna, lena n-áirítear príobháideachas agus cosaint sonraí pearsanta,

¹ IO L 265, 10.10.2005, lch. 1, an Comhaontú Eora-Mheánmhara lena mbunaítear Comhlachas idir an Comhphobal Eorpach agus a Bhallstáit agus Daon-Phoblacht Dhaonlathach na hAilgéire. Forairthne Uimh. 05-159, JORA Uimh. 31 an 30 Aibreán 2005 lena ndaingnítear an Comhaontú Eora-Mheánmhara lena mbunaítear Comhlachas idir Daon-Phoblacht Dhaonlathach na hAilgéire, de pháirt amháin, agus an Comhphobal Eorpach agus a Bhallstáit, den pháirt eile, arna shíniú in Valencia an 22 Aibreán 2002, agus Iarscríbhinní 1 agus 6 a ghabhann leis, Prótacail Uimh. 1 agus 7 agus an Ionstraim Chríochnaitheach.

² IO L 295, 21.11.2018, lch. 138.

ÓS DEIMHIN LEO go rachaidh an comhar breithiúnach idir údaráis inniúla na hAilgéire agus Eurojust chun tairbhe an dá thaobh agus go rannchuideoidh sé le luachanna coiteanna an dá Pháirtí a fhorbairt, lena n-áirítear an tsaoirse, an tslándáil agus an ceartas,

I bhFIANAISE an ardleibhéil cosanta do shonraí pearsanta san Aontas agus san Ailgéir,

I bhFIANAISE Dhearbhú Uilechoiteann Chearta an Duine an 10 Nollaig 1948 (na Náisiúin Aontaithe, Rún 217 A) agus na gcomhaontuithe idirnáisiúnta atá ina gceangal ar an dá Pháirtí,

Agus URRAIM Á TABHAIRT don Chúnant Idirnáisiúnta ar Chearta Sibhialta agus Polaitiúla an 16 Nollaig 1966 (na Náisiúin Aontaithe, Rún 2200 A),

I bhFIANAISE Choinbhinsiún na Náisiúin Aontaithe in aghaidh na Céastóireachta agus in aghaidh Íde nó Pionós Eile atá Cruálach, Mídhaonna nó Táireach an 10 Nollaig 1984 (na Náisiúin Aontaithe, Rún 39/46),

Agus URRAIM Á TABHAIRT do Choinbhinsiún na Náisiúin Aontaithe in aghaidh an Éillithe an 31 Deireadh Fómhair 2003 (GA/NA, Rún 58/4),

Agus URRAIM Á TABHAIRT ACU do Choinbhinsiún na Náisiúin Aontaithe in aghaidh na Coireachta Eagraithe Trasnáisiúnta (CNACET) an 15 Samhain 2000 (GA/NA, Rún 55/25),

AG FÉACHAINT d'oibleagáid an Aontais cloí le Choinbhinsiún Chomhairle na hEorpa (ETS Uimh. 5) chun Cearta an Duine agus Saoirsí Bunúsacha a Chosaint, arna dhéanamh sa Róimh an 4 Samhain 1950, rud a léirítear sa Chairt um Chearta Bunúsacha an Aontais,

TAR ÉIS COMHAONTÚ MAR A LEANAS:

Caibidil I

Sainmhínte, cuspóirí, raon feidhme agus forálacha coiteanna

Airteagal 1

Sainmhínte

Chun críoch an Chomhaontaithe seo, tá feidhm ag na sainmhínte seo a leanas:

- (1) ciallaíonn ‘Eurojust’ Gníomhaireacht an Aontais Eorpaigh um Chomhar Ceartais Choiriúil, arna bunú le Rialachán Eurojust;
- (2) ciallaíonn ‘Ballstáit’ Ballstáit an Aontais Eorpaigh;
- (3) ciallaíonn ‘údarás inniúil’
 - i gcás an Aontais, Eurojust, mar a shainmhínítear i mír 1, agus
 - i gcás na hAilgéire, aon údarás náisiúnta a liostaítear in Iarscríbhinn II a ghabhann leis an gComhaontú seoar a bhfuil freagrachtaí faoin dlí náisiúnta a bhaineann le cionta coiriúla a imscrúdú agus a ionchúiseamh, lena n-áirítear cur chun feidhme ionstraimí comhair bhreithiúnaigh in ábhair choiriúla;
- (4) ciallaíonn ‘údarás aistrithe’ an t-údarás inniúil a aistríonn sonraí pearsanta, i gcás inarb infheidhme;
- (5) ciallaíonn ‘údarás is faighteoir’ an t-údarás inniúil a fhaigheann faisnéis a bhaineann le sonraí pearsanta, i gcás inarb infheidhme;

- (6) ciallaíonn ‘comhlachtaí an Aontais’ na hinstiúidí, na comhlachtaí agus na gníomhaireachtaí arna mbunú leis na Conarthaí ar an Aontas Eorpach agus ar Fheidhmiú an Aontais Eorpaigh nó ar a mbonn sin, mar a liostaítear in Iarscríbhinn III a) a ghabhann leis an gComhaontú seo;
- (7) ciallaíonn ‘coireacht thromchúiseach’ na saghsanna coireachta a liostaítear in Iarscríbhinn I a ghabhann leis an gComhaontú seo i gcomhréir le forálacha agus comhthéacs an Chomhaontaithe seo;
- (8) ciallaíonn ‘cionta coiriúla gaolmhara’ na cionta coiriúla a dhéantar chun modh a fháil le coireanna tromchúiseacha a dhéanamh, chun coireanna tromchúiseacha a éascú nó a dhéanamh nó chun saoirse ó phionós a áirithiú dóibh siúd a dhéanann coireanna tromchúiseacha;
- (9) ciallaíonn ‘Cúntóir’ duine a fhéadfaidh cúnaimh a thabhairt do Chomhalta Náisiúnta, dá dtagraítear i gCaibidil II, Roinn II, de Rialachán Eurojust, agus do Leas-Chomhalta an Chomhalta Náisiúnta, nó don Ionchúisitheoir Idirchaidrimh, dá dtagraítear in Airteagal 5 den Chomhaontú seo;
- (10) ciallaíonn ‘Ionchúisitheoir Idirchaidrimh’ duine ag a bhfuil feidhm ionchúisitheora phoiblí, breithimh nó breithimh imscrúdaithe san Ailgéir i gcomhréir lena dlí náisiúnta agus atá ar iasacht ón Ailgéir do Eurojust de bhun Airteagal 5 den Chomhaontú seo;
- (11) ciallaíonn ‘Giúistís Idirchaidrimh’ giúistís dá dtagraítear i Rialachán Eurojust, arna phostú ag Eurojust chuig an Ailgéir de bhun Airteagal 7 den Chomhaontú seo;
- (12) ciallaíonn ‘sonraí pearsanta’ aon fhaisnéis, ar aon mheán, a bhaineann go díreach nó go hindíreach le duine nádúrtha sainaitheanta nó in-sainaitheanta (‘ábhar sonraí’), go háirithe trí thagairt a dhéanamh d’uimhir aitheantais nó d’fhachtóir amháin nó níos mó a bhaineann go sonrath le céannacht fhisiceach, fhiseolaíoch, ghéiniteach, bhithmhéadrach, mheabhrach, eacnamaíoch, chultúrtha nó shóisialta an duine sin nó aitheantóirí eile amhail sonraí súimh nó aitheantóir ar líne;
- (13) ciallaíonn ‘próiseáil’ aon oibríocht nó aon tacar oibríochtaí a dhéantar ar shonraí pearsanta nó ar thacair de sonraí pearsanta, trí mhodhanna uathoibríthe nó trí mhodhanna eile, amhail bailiú, taifeadadh, eagrú, struchtúrú, stóráil, oiriúnú nó athrú, aisghabháil, ceadú, úsáid, nochtadh trí tharchur, trí scaipeadh nó trí chur ar fáil ar bhealach eile, ailíniú nó comhcheangal, srianadh, blocáil, criptiú, léirscriosadh nó díothú;
- (14) ciallaíonn ‘ábhar sonraí’ aon duine nádúrtha sainaitheanta nó in-sainaitheanta a ndéantar a sonraí pearsanta a phróiseáil;
- (15) ciallaíonn ‘sonraí géiniteacha’ sonraí pearsanta a bhaineann le saintréithe géiniteacha duine nádúrtha, bídis ina saintréithe ó bhroinn nó ina saintréithe fáltais, a thugann faisnéis uathúil faoi fhiseolaíocht nó sláinte an duine nádúrtha sin agus arb é atá iontu an toradh, go háirithe, ar anailís arna déanamh ar shampla bitheolaíoch ón duine nádúrtha atá i gceist;
- (16) ciallaíonn ‘sonraí bithmhéadracha’ sonraí pearsanta a eascraíonn as próiseáil theicniúil ar leith agus a bhaineann le saintréithe fisiciúla, fiseolaíocha nó iompraíochta duine nádúrtha, ar sonraí iad lena gceadaítear nó lena ndeimhnítear sainaitheantacht uathúil an duine nádúrtha sin;
- (17) ciallaíonn ‘faisnéis’ sonraí pearsanta agus neamhphearsanta;

- (18) ciallaíonn ‘sárú i ndáil le sonraí pearsanta’ sárú ar shlándáil as a dtagann díothú, cailleadh, athrú nó nochtadh neamhúdaráithe sonraí pearsanta a rinneadh a tharchur, a stóráil nó a phróiseáil ar bhealach eile, nó rochtain neamhúdaráithe ar na sonraí sin, bíodh sé sin de thaisme nó go neamhdhleathach;
- (19) ciallaíonn ‘údarás maoirseachta’, i gcás an Aontais, an Maoirseoir Eorpach ar Chosaint Sonraí agus, i gcás na hAilgéire, an t-údarás náisiúnta um chosaint sonraí pearsanta (*autorité nationale de protection des données à caractère personnel*);
- (20) ciallaíonn ‘sonraí sláinte’ aon fhaisnéis a bhaineann le sláinte fhisiciúil nó le meabharshláinte an ábhair sonraí;
- (21) ciallaíonn ‘Comhaltaí Náisiúnta’ na Comhaltaí Náisiúnta atá tugtha ar iasacht ó gach Ballstát den Aontas chuig Eurojust, i gcomhréir le Rialachán Eurojust;
- (22) ciallaíonn ‘údarás próiseála’ an t-údarás a phróiseálann na sonraí pearsanta a aistrítear faoin gComhaontú seo, dá dtagraítear in Airteagail 14 go 17.

Airteagal 2

Cuspóirí

1. Is é cuspóir foriomlán an Chomhaontaithe seo feabhas a chur ar an gcomhar breithiúnach idir údaráis inniúla na hAilgéire agus Eurojust maidir leis an gcoireacht thromchúiseach a chomhrac.
2. Leis an gComhaontú seo ceadaítear sonraí pearsanta a aistriú idir údaráis inniúla na hAilgéire agus Eurojust, chun tacú lena ngníomhaíocht agus lena gcomhar maidir leis an gcoireacht thromchúiseach a imscrúdú agus a ionchúiseamh, go háirithe an choireacht eagraithe agus an sceimhlitheoireacht, an t-éilliú, sciúradh airgid agus an chibearchoireacht, agus cionta coiriúla gaolmhara, agus coimircí iomchuí á n-áirithiú an tráth céanna maidir le cearta bunúsacha agus saoirsí bunúsacha daoine aonair, lena n-áirítear príobháideacht agus cosaint sonraí pearsanta, agus chun an ghníomhaíocht agus an comhar sin a neartú.

Airteagal 3

Raon feidhme

I gcomhréir le forálacha ábhartha an Chomhaontaithe seo, áiritheoidh na Páirtithe go gcomhoibreoidh Eurojust agus údaráis inniúla na hAilgéire i réimsí a ngníomhaíochtaí agus a gcumhachtaí chun an choireacht thromchúiseach a chomhrac, mar a liostaítear in Iarscríbhinn I a ghabhann leis an gComhaontú seo, a mhéid a bhaineann le comhordú agus comhar in imscrúduithe agus in imeachtaí coiriúla.

Airteagal 4

Pointí teagmhála

1. Ainmneoidh an Ailgéir pointe teagmhála amháin ar a laghad laistigh dá húdaráis inniúla intíre chun an chumarsáid agus an comhar idir Eurojust agus údaráis inniúla na hAilgéire a éascú. Ní bheidh an tIonchúisitheoir Idirchaidrimh ina phointe teagmhála.
Ainmneoidh an Ailgéir pointe teagmhála freisin le haghaidh ábhair sceimhlitheoireachta.

2. Tabharfar fógra don Aontas faoi phointe teagmhála nó pointí teagmhála na hAilgéire. Cuirfidh an Ailgéis an tAontas ar an eolas má thagann athrú ar a pointí teagmhála.
3. Féadfaidh an Ailgéis a iarraidh ar an Aontas pointe teagmhála a ainmniú in Eurojust d'fhonn cumarsáid maidir le comhar idir Eurojust agus údaráis inniúla na hAilgéire a éascú. Ní bheidh an Giúistís Idirchaidrimh ina phointe teagmhála.

Airteagal 5

An tIonchúisitheoir Idirchaidrimh agus an fhoireann

1. Chun an comhar dá bhforáiltear sa Chomhaontú seo a éascú, tabharfaidh an Ailgéis Ionchúisitheoir Idirchaidrimh ar iasacht do Eurojust.
2. Is í an Ailgéis, i gcomhaontú le Eurojust, a chinnfidh sainordú agus fad iasachta an Ionchúisitheora Idirchaidrimh.
3. Féadfaidh Cúntóirí agus foireann tacaíochta cúnaimh a thabhairt don Ionchúisitheoir Idirchaidrimh, ag brath ar an ualach oibre agus i gcomhairle le Eurojust. I gcás inar gá, féadfaidh na Cúntóirí teacht in ionad an Ionchúisitheora Idirchaidrimh nó gníomhú thar a cheann.
4. Beidh an tIonchúisitheoir Idirchaidrimh agus Cúntóirí an Ionchúisitheora Idirchaidrimh inniúil chun gníomhú le húdaráis bhreithiúnacha na stát lena mbaineann faoi chuimsiú Eurojust.
5. Beidh rochtain ag an Ionchúisitheoir Idirchaidrimh agus ag Cúntóirí an Ionchúisitheora Idirchaidrimh ar an bhfaisnéis atá sna taifid choiriúla intíre nó in aon chlár ábhartha eile de chuid na hAilgéire, i gcomhréir lena dlí náisiúnta.
6. Agus a bhfeidhmeanna á gcomhlíonadh acu, beidh an chumhacht ag an Ionchúisitheoir Idirchaidrimh agus ag Cúntóirí an Ionchúisitheora Idirchaidrimh dul i dteagmháil go díreach le húdaráis inniúla na hAilgéire i gcomhréir leis na dlíthe agus na rialacháin atá i bhfeidhm.
7. Cuirfidh an Ailgéis Eurojust ar an eolas faoi chineál beacht agus faoi mhéid beacht na gcumhachtaí a thugtar don Ionchúisitheoir Idirchaidrimh agus do Chúntóirí an Ionchúisitheora Idirchaidrimh laistigh den Ailgéis chun a gcúraimí a chur i gcrích i gcomhréir leis an gComhaontú seo.
8. Déanfar na sonraí maidir le cúraimí an Ionchúisitheora Idirchaidrimh agus Chúntóirí an Ionchúisitheora Idirchaidrimh, a gcearta agus a n-oibleagáidí agus na costais lena mbaineann a rialú le socrú oibre arna thabhairt i gcrích idir Aireacht Dlí agus Cirt na hAilgéire agus Eurojust i gcomhréir le hAirteagal 28 den Chomhaontú seo.
9. Cinnfidh Eurojust go mbeidh doiciméid oibre an Ionchúisitheora Idirchaidrimh agus Chúntóirí an Ionchúisitheora Idirchaidrimh ina ndoiciméid oibre dosháraithe.

Airteagal 6

Cruinnithe oibríochtúla agus straitéiseacha

1. Féadfaidh an tIonchúisitheoir Idirchaidrimh, Cúntóirí an Ionchúisitheora Idirchaidrimh agus ionadaithe eile ó údaráis inniúla na hAilgéire, lena n-áirítear na pointí teagmhála dá dtagraítear in Airteagal 4, páirt a ghlacadh i gcrúinnithe straitéiseacha maidir le cúrsaí straitéiseacha ar chuireadh ó Uachtarán Eurojust, agus i gcrúinnithe oibríochtúla le formheas na gComhaltaí Náisiúnta lena mbaineann.

2. Féadfaidh Comhaltaí Náisiúnta, a Leas-Chomhaltaí agus a gCúntóirí, Stiúrthóir Riaracháin Eurojust agus foireann Eurojust freastal ar chruinnithe arna n-eagrú ag an Ionchúisitheoir Idirchaidrimh, nó ag Cúntóirí an Ionchúisitheora Idirchaidrimh arna iarraidh sin don Ionchúisitheoir Idirchaidrimh.

Airteagal 7

An Giúistís Idirchaidrimh

1. Chun comhar breithiúnach leis an Ailgéir a éascú, féadfaidh Eurojust, mar a fhoráiltear ina Rialachán, Giúistís Idirchaidrimh a thabhairt ar iasacht don Ailgéir, i gcomhréir leis an gComhaontú seo.
2. Cuirfidh Eurojust an Ailgéir ar an eolas faoi chineál agus méid beacht na gcumhachtaí a thugtar don Ghiúistís Idirchaidrimh chun a chúraimí a dhéanamh i gcomhréir leis an gComhaontú seo.
3. Beidh sonraí maidir le cúraimí an Ghiúistís Idirchaidrimh, cearta agus oibleagáidí an Ghiúistís sin agus na costais lena mbaineann faoi rialú socrú oibre arna thabhairt i gcrích idir Aireacht Dlí agus Cirt na hAilgéire agus Eurojust.

Airteagal 8

Foirne Comhphárteacha um Imscrúdú

1. Féadfaidh Eurojust cúnadh a sholáthar chun foirne comhphárteacha um imscrúdú (FCInna) a bhunú idir údarais náisiúnta Ballstáit amháin nó níos mó agus údarais inniúla na hAilgéire de bhun an bhunúis dlí is infheidhme lena gcumasaítear comhar breithiúnach in ábhair choiriúla.
2. Chun críocha mhír 1, d'fhéadfadh sé go n-iarrfaí ar Eurojust cúnadh airgeadais nó teicniúil a chur ar fáil chun foireann chomhphárteach imscrúdaithe a oibriú, ar foireann í lena dtacaíonn sí go hoibríochtúil.

Caibidil II

Malartú faisnéise agus cosaint sonraí

Airteagal 9

Cuspóirí na próiseála sonraí pearsanta

1. Ní dhéanfar sonraí pearsanta a iarrtar agus a fhaightear faoin gComhaontú seo a phróiseáil ach amháin chun cionta coiriúla a chosc agus a bhrath, le haghaidh imscrúduithe agus ionchúisimh ghaolmhara nó chun pionóis choiriúla a fhorchur, i gcomhréir le forálacha ábhartha an Chomhaontaithe seo agus laistigh de theorainneacha Airteagal 10 agus de shainorduithe na n-údarás inniúil féin.
2. Léireoidh na húdarais inniúla go soiléir, tráth nach déanaí ná tráth aistrithe na sonraí pearsanta, an chríoch shonrach nó na críocha sonracha dá bhfuil na sonraí á n-aistriú.

Airteagal 10

Prionsabail ghinearálta cosanta sonraí

1. Déanfaidh gach Páirtí an méid seo a leanas a áirithiú maidir le sonraí pearsanta a aistreofar agus a phróiseálfar ina dhiaidh sin faoin gComhaontú seo:
 - (a) próiseálfar iad ar bhealach cóir agus dleathach, chun na gcríoch dár aistríodh iad i gcomhréir le hAirteagal 9, agus chun na gcríoch sin amháin, agus déanfar é sin ar bhealach atá go hiomlán trédhearcach. Measfar go dtagraíonn an trédhearcacht thuasluaite do na rialacha agus do na prionsabail lena rialaítear próiseáil sonraí pearsanta.
 - (b) beidh siad leordhóthanach, ábhartha agus ní bheidh siad iomarcach i ndáil leis na cuspóirí dá ndéantar iad a phróiseáil;
 - (c) beidh siad cruinn agus, i gcás inar gá, coimeádfar cothrom le dáta iad; áiritheoidh gach Páirtí go ndéanfaidh na húdaráis inniúla gach beart réasúnta lena áirithiú go scriosfar nó go gceartófar gan moill mhíchúí sonraí pearsanta atá míchruinn, ag féachaint do na cuspóirí dá ndéantar iad a phróiseáil;
 - (d) déanfar iad a choinneáil i bhfoirm nach gceadaítear léi na hábhair sonraí a shainnithint ach go ceann tréimhse nach faide ná mar is gá chun na críocha sin ar chucu a dhéantar na sonraí pearsanta a phróiseáil a bhaint amach;
 - (e) déanfar iad a phróiseáil ar bhealach lena n-áirithítear slándáil iomchuí na sonraí pearsanta, lena n-áirítear cosaint ar phróiseáil neamhúdaráithe nó neamhdhleathach agus ar chailleadh, díothú nó damáiste de thaisme, agus úsáid á baint as bearta iomchuí teicniúla nó eagraíochtúla inmheánacha.
2. Agus na sonraí sin á n-aistriú aige, féadfaidh an t-údarás aistrithe, tráth aistriú na sonraí pearsanta, aon srian ar rochtain orthu nó ar an úsáid atá le baint astu a shonrú i dtéarmaí ginearálta nó sonracha, lena n-áirítear a mhéid a bhaineann lena n-aistriú ar aghaidh, lena léirscriosadh nó lena ndíothú tar éis tréimhse áirithe ama, nó a mhéid a bhaineann leis an bpróiseáil bhreise a dhéanfar orthu. I gcás inar léir go bhfuil gá le srianta den sórt sin tar éis na sonraí a aistriú, cuirfidh an t-údarás aistrithe an t-údarás is faighteoir ar an eolas dá réir.
3. Áiritheoidh gach Páirtí go gcomhlíonfaidh an t-údarás is faighteoir aon srian ar rochtain nó ar úsáid na sonraí pearsanta arna cur in iúl ag an údarás aistrithe dá dtagraítear i mír 2.
4. Forálfaidh gach Páirtí go gcuirfidh a údaráis inniúla bearta teicniúla agus eagraíochtúla iomchuí chun feidhme ionas go mbeifear in ann a thaispeáint go gcomhlíonann an phróiseáil sonraí pearsanta an Comhaontú seo agus go gcosnófar cearta na n-ábhar sonraí lena mbaineann.
5. Comhlíonfaidh gach Páirtí na coimircí dá bhforáiltear sa Chomhaontú seo, gan beann ar náisiúntacht an ábhair sonraí lena mbaineann agus gan idirdhealú.
6. Áiritheoidh gach Páirtí nach bhfaighfear faisnéis arna haistriú faoin gComhaontú seo nó nach n-úsáidfear í de shárú ar chearta an duine a aithnítear leis an dlí idirnáisiúnta i gcomhréir le gealltanais agus oibleagáidí idirnáisiúnta gach Páirtí faoi seach.

Áiritheoidh gach Páirtí freisin nach n-úsáidfear an fhaisnéis a gheofar chun pionós an bháis a iarraidh nó, i gcás ina bhfógrófar pionós den sórt sin, nach gcuirfear i gcrích í.

7. Áiritheoidh gach Páirtí go gcoimeádfar taifead de gach aistriú sonraí pearsanta faoin Airteagal seo agus de chríocha na n-aistrithe sin.

Airteagal 11

Próiseáil sonraí íospartach agus finnétithe, agus catagóirí speisialta sonraí pearsanta

1. Ní cheadófar aistriú sonraí pearsanta maidir le híospartaigh ciona choiriúil, finnétithe nó daoine eile ar féidir leo faisnéis a sholáthar faoi chionta coiriúla ach amháin i gcás ina bhfuil sé sin fíor-riachtanach agus comhréireach i gcásanna aonair chun coir thromchúiseach a imscrúdú agus a ionchúiseamh.
2. Ní cheadófar aistriú sonraí pearsanta lena nochtar bunadh ciníoch nó eitneach, tuairimí polaitiúla, creideamh reiligiúnach nó fealsúnach, ná ballraíocht i gceardchumann, sonraí géiniteacha, sonraí bithmhéadracha a phróiseáiltear chun duine aonair a shainaithint go huathúil, sonraí a bhaineann le sláinte nó saol pearsanta príobháideach duine aonair, lena n-áirítear a shaol gnéis, ach amháin i gcás ina bhfuil géarghá leis agus ina bhfuil sé comhréireach i gcásanna aonair chun coir tromchúiseach a imscrúdú agus a ionchúiseamh.
3. Áiritheoidh na Páirtithe go mbeidh próiseáil sonraí pearsanta faoi mhíreanna 1 agus 2 faoi réir coimircí breise, lena n-áirítear srianta ar rochtain, bearta slándála breise agus srianta ar aistrithe ar aghaidh.

Airteagal 12

Uathphróiseáil sonraí pearsanta

Toirmeascfar cinntí atá bunaithe go huile agus go hiomlán ar uathphróiseáil sonraí pearsanta a aistrítear, lena n-áirítear próifiliú, a bhfuil éifeacht dhíobhálach dhlíthiúil acu ar an ábhar sonraí nó a dhéanann difear mór dó, mura n-údaráitear iad leis an dlí chun coir tromchúiseach a imscrúdú agus a ionchúiseamh, agus mura bhfuil coimircí reachtúla iomchuí ann do chearta agus saoirsí an ábhair sonraí, lena n-áirítear ar a laghad an ceart chun idirghabháil dhaonna a fháil.

Airteagal 13

Na sonraí pearsanta a fhaightear a aistriú ar aghaidh

1. Áiritheoidh an Ailgéir go dtoirmiscfear ar a húdaráis inniúla sonraí pearsanta a fhaightear faoin gComhaontú seo a aistriú chuig údaráis eile san Ailgéir mura gcomhlíontar gach ceann de na coinníollacha seo a leanas:
 - (a) tá údarú sainráite tugtha ag Eurojust roimh ré;
 - (b) ní dhéantar an t-aistriú ar aghaidh ach chun na críche dár aistríodh na sonraí i gcomhréir le hAirteagal 9 agus chun na críche sin amháin; agus
 - (c) tá an t-aistriú faoi réir na gcoinníollacha agus na gcoimircí céanna a bhfuil feidhm acu maidir leis an aistriú bunaidh.

Gan dochar d'Airteagal 10(2), ní bheidh gá le réamhúdarú nuair a chomhroinnfear sonraí pearsanta, i gcás inar gá, le ceann de na comhlachtaí lena mbaineann a liostaítear in Iarscríbhinn IV.

2. Áiritheoidh an Ailgéir go dtoirmiscfear ar a húdaráis inniúla sonraí pearsanta a fhaightear faoin gComhaontú seo a aistriú ar aghaidh chuig údaráis tríú tír nó chuig

eagraíocht idirnáisiúnta, mura gcomhlíontar gach ceann de na coinníollacha seo a leanas:

- (a) baineann an t-aistriú ar aghaidh le sonraí pearsanta seachas na sonraí a chumhdaítear le hAirteagal 11;
 - (b) tá údarú sainráite tugtha ag Eurojust roimh ré; agus
 - (c) is ionann cuspóir an aistrithe ar aghaidh agus cuspóir an aistrithe ag Eurojust.
3. Áiritheoidh an tAontas go dtoirmeascfar sonraí pearsanta a fhaigheann Eurojust faoin gComhaontú seo a aistriú ar aghaidh chuig comhlachtaí eile de chuid an Aontais nó chuig údaráis na mBallstát, mura gcomhlíonfar na coinníollacha uile seo a leanas:
- (a) tá údarú sainráite tugtha ag an Ailgéir roimh ré;
 - (b) ní dhéantar an t-aistriú ar aghaidh ach chun na críche dár aistríodh na sonraí i gcomhréir le hAirteagal 9, agus chun na críche sin amháin; agus
 - (c) tá an t-aistriú faoi réir na gcoinníollacha agus na gcoimircí céanna a bhfuil feidhm acu maidir leis an aistriú bunaidh.

Gan dochar d'Airteagal 10(2), ní bheidh gá le réamhúdarú nuair a chomhroinnfear sonraí pearsanta, i gcás inar gá, le ceann de na húdaráis nó de na húdaráis nó comhlachtaí lena mbaineann a liostaítear in Iarscríbhinn III.

4. Áiritheoidh an tAontas go dtoirmiscfear ar Eurojust sonraí pearsanta a fhaightear faoin gComhaontú seo a aistriú ar aghaidh, chuig údaráis tríú tír nó chuig eagraíocht idirnáisiúnta, mura gcomhlíonfar na coinníollacha uile seo a leanas:
- (a) baineann an t-aistriú ar aghaidh le sonraí pearsanta seachas na sonraí a chumhdaítear le hAirteagal 11;
 - (b) tá údarú sainráite tugtha ag an Ailgéir roimh ré; agus
 - (c) is ionann cuspóir an aistrithe ar aghaidh agus cuspóir an aistrithe ag an Ailgéir.

Airteagal 14

Ceart rochtana

1. Déanfaidh na Páirtithe foráil maidir le ceart an ábhair sonraí deimhniú a fháil ó na húdaráis próiseála i dtaobh an ndéantar sonraí pearsanta a bhaineann leis a phróiseáil faoin gComhaontú seo agus, i gcás ina ndéantar, rochtain a fháil ar an bhfaisnéis seo a leanas ar a laghad:
 - (a) críocha agus bunús dlí na próiseála, na catagóirí sonraí lena mbaineann, agus, i gcás inarb infheidhme, na faighteoirí nó na catagóirí faighteoirí ar nochtadh na sonraí pearsanta dóibh nó a nochtfar na sonraí pearsanta dóibh;
 - (b) gurb ann don cheart ceartú nó léirscriosadh sonraí pearsanta, nó srianadh ar phróiseáil sonraí pearsanta, a fháil ón údarás;
 - (c) i gcás inar féidir, fad na tréimhse a mheastar go stórálfar na sonraí pearsanta, nó i gcás nach féidir é sin a thabhairt, na critéir a úsáidtear chun an tréimhse sin a chinneadh;
 - (d) fógra, i dteanga shoiléir shimplí, faoi na sonraí pearsanta a bhfuil próiseáil á déanamh orthu agus faoi aon fhaisnéis atá ar fáil faoina gcuid foinsí;

- (e) an ceart gearán a thaisceadh leis an údarás maoirseachta dá dtagraítear in Airteagal 21;
- (f) sonraí teagmhála an údaráis maoirseachta.

I gcásanna ina bhfeidhmítear an ceart rochtana dá dtagraítear sa chéad fhomhír, rachfar i gcomhairle leis an údarás aistrithe ar bhonn neamhcheangailteach sula ndéanfar cinneadh críochnaitheach maidir leis an iarraidh ar rochtain.

2. Déanfaidh na Páirtithe foráil go dtabharfaidh an t-údarás próiseála lena mbaineann aghaidh ar an iarraidh gan moill mhíchuí, agus in aon chás, laistigh de 3 mhí ón iarraidh a fháil.
3. Féadfaidh na Páirtithe foráil a dhéanamh maidir leis an bhféidearthacht moill a chur ar chur in iúl na faisnéise dá dtagraítear i mír 1, nó é a dhiúltú nó a srianadh, a mhéid is gur beart é an mhoill, an diúltú nó an srianadh sin a bhfuil gá leis nó atá réasúnta agus comhréireach, agus fad atá sin amhlaidh, agus cearta bunúsacha agus leasanna bunúsacha an ábhair sonraí á gcur san áireamh acu, chun an méid seo a leanas a dhéanamh:
 - (a) bac ar fhiosrúcháin oifigiúla nó dhlíthiúla, imscrúduithe oifigiúla nó dlíthiúla nó nósanna imeachta oifigiúla nó dlíthiúla a sheachaint;
 - (b) dochar do chosc, do bhrath, d'imscrúdú nó d'ionchúiseamh cionta coiriúla, nó d'fhorghníomhú pionós coiriúil, a sheachaint;
 - (c) an tslándáil phoiblí a chosaint;
 - (d) an tslándáil náisiúnta a chosaint; nó
 - (e) cearta agus saoirsí daoine eile a chosaint, go háirithe íospartaigh agus finnétithe.
4. Forálfaidh na Páirtithe go gcuirfidh an t-údarás próiseála lena mbaineann an t-ábhar sonraí ar an eolas i scríbhinn maidir leis na nithe seo a leanas:
 - (a) aon mhoill, aon diúltú nó aon srian ar rochtain agus na cúiseanna atá leis sin; agus
 - (b) an deis gearán a thaisceadh leis an údarás maoirseachta inniúil nó an deis leigheas breithiúnach a lorg.

An fhaisnéis a leagtar amach sa chéad fhomhír, pointe (a), den mhír seo, féadfar í a fhágáil ar lár i gcás ina bhféadfadh soláthar na faisnéise sin an bonn a bhaint de chuspóir na moille, an diúltaithe nó an tsriain faoi mhír 3.

Airteagal 15

An ceart go ndéanfaí ceartúchán, léirscriosadh nó srianadh

1. Déanfaidh na Páirtithe foráil go mbeidh sé de cheart ag aon ábhar sonraí ceartú sonraí pearsanta míchruinne a bhaineann leis a fháil ó na húdaráis próiseála. De réir chuspóirí na próiseála, áireofar leis an gceart go ndéanfaí ceartúchán an ceart go ndéanfaí sonraí pearsanta atá neamhiomlána a aistriódh faoin gComhaontú seo a fhorlíonadh.
2. Déanfaidh na Páirtithe foráil go mbeidh sé de cheart ag aon ábhar sonraí léirscriosadh sonraí pearsanta a bhaineann leis a fháil ó na húdaráis próiseála i gcás ina sáraíonn próiseáil na sonraí pearsanta Airteagal 10(1), Airteagal 11 nó Airteagal

12, nó i gcás nach mór na sonraí pearsanta a léirscriosadh chun oibleagáid dhlíthiúil a chomhlíonadh a bhfuil na húdaráis faoina réir.

3. Féadfaidh na Páirtithe foráil a dhéanamh go bhféadfaidh na húdaráis próiseála srian ar phróiseáil a dheonú seachas an ceartú nó an léirscriosadh sonraí pearsanta dá dtagraítear i míreanna 1 agus 2 sna cásanna seo a leanas:
 - (a) i gcás ina gcuireann an t-ábhar sonraí i gcoinne chruinneas na sonraí pearsanta agus nach féidir a gcrúinneas nó a míchruinneas a fhionnadh; nó
 - (b) i gcás inar gá na sonraí pearsanta a stóráil chun críoch fianaise.
4. Cuirfidh an t-údarás aistrithe agus an t-údarás próiseála a chéile ar an eolas faoi aon chás dá dtagraítear i míreanna 1, 2 agus 3. Déanfaidh an t-údarás próiseála na sonraí pearsanta lena mbaineann a cheartú nó a léirscriosadh, nó a bpróiseáil a shrianadh, i gcomhréir leis an ngníomhaíocht a dhéanfaidh an t-údarás aistrithe.
5. Déanfaidh na Páirtithe foráil go gcuirfidh an t-údarás próiseála, tar éis dó iarraidh a fháil faoi mhír 1 nó 2, in iúl don ábhar sonraí i scríbhinn gan moill mhíchúí gur ceartaíodh nó gur léirscriosadh na sonraí pearsanta, nó gur srianadh a bpróiseáil.
6. Déanfaidh na Páirtithe foráil go gcuirfidh an t-údarás próiseála, tar éis dó iarraidh a fháil faoi mhír 1 nó 2, an t-ábhar sonraí ar an eolas i scríbhinn maidir leis an méid seo a leanas:
 - (a) aon diúltú ar an iarraidh agus na cúiseanna atá leis;
 - (b) an fhéidearthacht chun gearán a thaisceadh leis an údarás maoirseachta inniúil; agus
 - (c) an fhéidearthacht leigheas breithiúnach a lorg.

Féadfar an fhaisnéis a liostaítear sa chéad fhomhír, pointe (a), den mhír seo, a fhágáil ar lár faoi na coinníollacha a leagtar amach in Airteagal 14(3).

Airteagal 16

Fógra faoi shárú i ndáil le sonraí pearsanta a thabhairt do na húdaráis lena mbaineann

1. I gcás sárú i ndáil le sonraí pearsanta a bhaineann le sonraí pearsanta a aistrítear faoin gComhaontú seo, déanfaidh na Páirtithe foráil go dtabharfaidh a n-údaráis is faighteoir agus a n-údaráis aistrithe féin fógra dá chéile agus dá n-údarás maoirseachta féin faoin sárú sin gan mhoill, mura rud é nach dócha go mbeidh riosca do chearta agus saoirsí daoine nádúrtha mar thoradh ar an sárú i ndáil le sonraí pearsanta, agus go ndéanfaidh siad bearta chun na héifeachtaí díobhálacha a d'fhéadfadh a bheith aige a mhaolú.
2. Tabharfar tuairisc san fhógra ar an méid seo a leanas ar a laghad:
 - (a) an cineál sáráithe atá ann i ndáil le sonraí pearsanta, lena n-áirítear, nuair is féidir, na catagóirí agus an líon ábhar sonraí lena mbaineann agus na catagóirí agus an líon taifead sonraí pearsanta lena mbaineann;
 - (b) iarmhairtí dóchúla an tsáráithe i ndáil le sonraí pearsanta;
 - (c) na bearta atá déanta ag an údarás próiseála, nó atá beartaithe aige a dhéanamh, lena n-áirítear na bearta atá déanta chun aon éifeacht dhíobhálach a d'fhéadfadh a bheith ag an sárú a mhaolú.

3. I gcás nach féidir, agus a mhéid nach féidir, an fhaisnéis dá dtagraítear i mír 2 a chur ar fáil an tráth céanna, féadfar an fhaisnéis a sholáthar i gcéimeanna gan tuilleadh moille míchuí.
4. Déanfaidh na Páirtithe foráil go ndéanfaidh a n-údarás próiseála féin aon sárú i ndáil le sonraí pearsanta a dhéanann difear do shonraí pearsanta a aistrítear faoin gComhaontú seo a dhoiciméadú, lena n-áirítear na fíricí a bhaineann leis an sárú, na héifeachtaí a bhaineann leis agus na gníomhaíochtaí feabhais a rinneadh, rud a chuirfidh ar a gcumas dá n-údarás mhaoirseachta féin a fhíorú go bhfuil an tAirteagal seo á chomhlíonadh.

Airteagal 17

Sárú i ndáil le sonraí pearsanta a chur in iúl don ábhar sonraí

1. I gcás inar dócha go mbeidh riosca ard ann do chearta agus saoirsí daoine nádúrtha de dheasca sárú i ndáil le sonraí pearsanta dá dtagraítear in Airteagal 16, déanfaidh na Páirtithe foráil go gcuirfidh a n-údarás féin an sárú i ndáil le sonraí pearsanta in iúl don ábhar sonraí gan moill mhíchuí.
2. Agus é sin á chur in iúl don ábhar sonraí de bhun mhír 1, tabharfar tuairisc i dteanga shoiléir shimplí ar chineál an tsáraithe i ndáil le sonraí pearsanta agus áireofar ar a laghad na heilimintí dá bhforáiltear in Airteagal 16(2), pointí (b) agus (c).
3. An t-eolas a chur in iúl don ábhar sonraí mar a thagraítear i mír 1, ní cheanglófar sin sna cásanna seo a leanas:
 - (a) má bhí na sonraí pearsanta a bhaineann leis an sárú faoi réir bearta cosanta teicneolaíochta agus eagraíochta iomchuí a fhágann nach mbeidh aon duine nach bhfuil údaraithe chun rochtain a fháil ar na sonraí in ann iad a thuiscint;
 - (b) má rinneadh bearta ina dhiaidh sin lena n-áirithítear nach dócha go dtiocfaidh an riosca ard do chearta agus saoirsí na n-ábhar sonraí chun cinn a thuilleadh; nó
 - (c) bheadh iarracht dhíríreach ag baint le cur in iúl den sórt sin, go háirithe i ngeall ar an líon cásanna lena mbaineann. Más amhlaidh atá, eiseoidh an t-údarás teachtaireacht phoiblí nó déanfaidh sé beart comhchosúil trína dtabharfar fógra do na hábhair sonraí ar bhealach atá chomh héifeachtúil céanna.
4. An t-eolas a chur in iúl don ábhar sonraí, féadfar é sin a mhoilliú, a shrianadh nó a fhágáil ar lár faoi na coinníollacha a leagtar amach in Airteagal 14(3).

Airteagal 18

Sonraí pearsanta a stóráil, a athbhreithniú, a cheartú agus a scriosadh

1. Déanfaidh na Páirtithe foráil go mbunófar teorainneacha ama iomchuí maidir le sonraí pearsanta a fhaightear faoin gComhaontú seo a stóráil nó maidir le hathbhreithniú tréimhsiúil a dhéanamh ar an ngá atá leis na sonraí sin a stóráil, ionas nach stórálfar na sonraí sin ar feadh tréimhse níos faide ná mar is gá chun na críche dá n-aistrítear iad.
2. In aon chás, déanfar athbhreithniú ar an ngá le stóráil leanúnach tráth nach déanaí ná 3 bliana tar éis aistriú na sonraí pearsanta.
3. I gcás ina bhfuil cúis ag an údarás aistrithe a chreidiúint go bhfuil sonraí pearsanta a d'aistrigh sé roimhe sin mícheart, míchruinn, nach bhfuil siad cothrom le dáta a thuilleadh nó nár cheart iad a bheith aistrithe, cuirfidh sé an t-údarás is faighteoir ar an

eolas, agus ceartóidh nó léirsciosfaidh sé na sonraí pearsanta, agus tabharfaidh sé fógra ina leith don údarás aistrithe.

4. I gcás ina bhfuil cúis ag údarás inniúil a chreidiúint go bhfuil sonraí pearsanta a fuair sé roimhe sin mícheart, míchruinn, nach bhfuil siad cothrom le dáta a thuilleadh nó nár cheart iad a bheith aistrithe, cuirfidh sé an t-údarás aistrithe ar an eolas agus tabharfaidh an t-údarás aistrithe a sheasamh maidir leis an ábhar.

I gcás ina gcinnfidh an t-údarás aistrithe go bhfuil na sonraí pearsanta mícheart, míchruinn, nach bhfuil siad cothrom le dáta a thuilleadh nó nár cheart iad a bheith aistrithe, cuirfidh sé an t-údarás is faighteoir ar an eolas, agus ceartóidh nó léirsciosfaidh an t-údarás is faighteoir na sonraí pearsanta lena mbaineann agus tabharfaidh sé fógra ina leith don údarás aistrithe.

Airteagal 19

Logáil agus doiciméadacht

1. Déanfaidh na Páirtithe foráil maidir le logaí nó doiciméadacht eile a choimeád i ndáil le bailiú, athrú, rochtain, nochtadh, lena n-áirítear aistriú ar aghaidh, comhcheangal agus léirsciosadh sonraí pearsanta.
2. Cuirfear na logaí nó an doiciméadacht dá dtagraítear i mír 1 ar fáil don údarás maoirseachta arna iarraidh sin dó agus ní úsáidfear iad ach chun dlíthiúlacht na próiseála sonraí a fhíorú, chun féinfhaireachán a dhéanamh agus chun sláine agus slándáil iomchuí sonraí a áirithiú.

Airteagal 20

Slándáil sonraí

1. Áiritheoidh na Páirtithe go gcuirfear bearta teicniúla agus eagraíochtúla chun feidhme chun sonraí pearsanta a aistrefar faoin gComhaontú seo a chosaint.
2. Maidir le huathphróiseáil sonraí, áiritheoidh na Páirtithe go gcuirfear bearta chun feidhme a bheidh ceaptha chun an méid seo a leanas a dhéanamh:
 - (a) rochtain ar threalamh próiseála sonraí a úsáidtear le haghaidh próiseáil sonraí pearsanta ('rialú rochtana ar threalamh') a shéanadh ar dhaoine neamhúdaráithe;
 - (b) cosc a chur ar mheáin sonraí a bheith á léamh, á modhnú nó á mbaint ar bhealach neamhúdaráithe ('rialú meán sonraí');
 - (c) ionchur neamhúdaráithe sonraí pearsanta a chosc chomh maith le cigireacht neamhúdaráithe, modhnú neamhúdaráithe nó scriosadh neamhúdaráithe na sonraí pearsanta stóráilte ('rialú stórála');
 - (d) cosc a chur ar dhaoine neamhúdaráithe a bhfuil trealamh cumarsáide sonraí á úsáid acu úsáid a bhaint as córais uathphróiseála sonraí ('rialú úsáideoirí');
 - (e) a áirithiú nach mbeidh rochtain ag daoine atá údaráithe chun córas uathphróiseála sonraí a úsáid ach ar na sonraí atá cumhdaithe faoina n-údarú rochtana ('rialú rochtana sonraí');
 - (f) a áirithiú gur féidir a fhíorú agus a shuíomh cén eintiteas a bhféadfaí sonraí pearsanta a tharchur chucu nó a bhfuil sonraí pearsanta tarchurtha chucu agus úsáid á baint as trealamh cumarsáide sonraí ('rialú cumarsáide');

- (g) a áirithiú gur féidir a fhíorú agus a shuíomh cé acu na sonraí pearsanta a cuireadh isteach i gcórais uathphróiseála sonraí, cén uair a cuireadh isteach na sonraí agus cé a chuir isteach iad ('rialú ionchuir');
- (h) cosc a chur ar léamh, ar chóipeáil, ar mhodhnú nó ar scriosadh neamhúdaraithe sonraí pearsanta le linn a n-aistriú nó le linn meáin sonraí a aistriú ('rialú iompair');
- (i) a áirithiú gur féidir córais atá suiteáilte, i gcás idirbhriste, a aischur láithreach ('athshlánú');
- (j) a áirithiú go bhfeidhmeoidh feidhmeanna an chórais gan locht, go ndéanfar lochtanna a thiocthaidh aníos sna feidhmeanna a thuairisciú láithreach ('iontaofacht') agus nach bhféadfar mífheidhmeanna córais sonraí pearsanta stóráilte a thruailliú ('sláine').

Airteagal 21

An t-údarás maoirseachta

1. Déanfaidh na Páirtithe foráil maidir le húdarás poiblí neamhspleách amháin nó níos mó atá freagrach as cosaint sonraí chun maoirseacht a dhéanamh ar chur chun feidhme an Chomhaontaithe seo, agus chun a áirithiú go gcomhlíonfar é, chun cearta agus saoirsí bunúsacha daoine nádúrtha a chosaint i ndáil le próiseáil sonraí pearsanta.
2. Áiritheoidh na Páirtithe an méid seo a leanas:
 - (a) gníomhóidh an t-údarás maoirseachta ar bhealach a bheidh go hiomlán neamhspleách agus a chúraimí á gcomhlíonadh aige agus a chumhachtaí á bhfeidhmiú aige;
 - (b) tá gach údarás maoirseachta saor ó thionchar seachtrach, bíodh sé díreach nó indíreach, agus ní fhéachann sé le treoracha ná ní ghlacann sé le treoracha;
 - (c) beidh téarma oifige slán ag comhaltaí gach údaráis maoirseachta, lena n-áirítear coimircí i gcoinne baint threallach.
3. Áiritheoidh na Páirtithe go mbeidh na hacmhainní daonna, teicniúla agus airgeadais, an t-áitreabh agus an bonneagar is gá ag gach údarás maoirseachta chun a chúraimí a chomhlíonadh go héifeachtach agus a chumhachtaí a fheidhmiú go héifeachtach.
4. Áiritheoidh na Páirtithe go mbeidh cumhachtaí éifeachtacha imscrúdaithe agus idirghabhála ag gach údarás maoirseachta chun maoirseacht a dhéanamh ar na comhlachtaí a ndéanann sé maoirseacht orthu agus chun dul i mbun imeachtaí dlíthiúla.
5. Áiritheoidh na Páirtithe go mbeidh cumhachtaí ag gach údarás maoirseachta gearáin a éisteacht ó dhaoine aonair maidir le húsáid a sonraí pearsanta agus aghaidh a thabhairt ar na gearáin sin.

Airteagal 22

Ceart chun leigheas éifeachtach breithiúnach

1. Áiritheoidh na Páirtithe, gan dochar d'aon leigheas riaracháin nó neamhbhreithiúnach eile, go mbeidh an ceart ag gach ábhar sonraí leigheas breithiúnach éifeachtach a fháil i gcás ina measann sé gur sáraíodh a chearta a ráthaítear faoin gComhaontú seo mar thoradh ar phróiseáil a shonraí pearsanta de shárú ar an gComhaontú seo.

2. Áireofar leis an gceart chun leigheas breithiúnach éifeachtach a fháil an ceart chun cúiteamh a fháil, faoi na coinníollacha a leagtar amach i gcreat dlíthiúil gach Páirtí faoi seach, as aon damáiste a rinneadh don ábhar sonraí leis an bpróiseáil sin mar thoradh ar shárú ar an gComhaontú.

Airteagal 23

Fógra a thabhairt maidir le cur chun feidhme

1. Déanfaidh na Páirtithe foráil go gcuirfidh gach údarás inniúil a shonraí teagmhála ar fáil go poiblí mar aon le doiciméad ina leagfar amach, agus teanga shoiléir shimplí á húsáid, faisnéis maidir leis na coimircí le haghaidh sonraí pearsanta a ráthaítear faoin gComhaontú seo, lena n-áirítear faisnéis lena gcumhdaítear ar a laghad na míreanna dá dtagraítear in Airteagal 14(1), pointí (a) agus (c), agus na modhanna atá ar fáil chun cearta na n-ábhar sonraí a fheidhmiú.
2. Mura bhfuil siad i bhfeidhm cheana, glacfaidh na húdaráis inniúla rialacha lena sonraítear conas a dhéanfar comhlíonadh na bhforálacha maidir le próiseáil sonraí pearsanta a fhorfheidhmiú go praiticiúil.

Caibidil III

Rúndacht faisnéise

Airteagal 24

Rúndacht na faisnéise a mhalartaítear

Agus forálacha an Chomhaontaithe seo á gcur chun feidhme, beidh sé d'oibleagáid ar na Páirtithe rúndacht na faisnéise a mhalartaítear idir Eurojust agus údaráis inniúla na hAilgéire a áirithiú, mura mbeidh an fhaisnéis sin curtha ar fáil go dleathach don phobal cheana nó mura mbeidh rochtain ag an bpobal uirthi cheana féin.

Airteagal 25

Faisnéis rúnaicmithe nó faisnéis íogair neamh-rúnaicmithe AE a mhalartú

Déanfar malartú faisnéise rúnaicmithe nó faisnéise íogaire neamh-rúnaicmithe AE, más gá faoin gComhaontú seo, agus cosaint na faisnéise sin a rialú le socrú oibre arna thabhairt i gcrích idir Eurojust agus údaráis inniúla na hAilgéire.

Caibidil IV

Dliteanas

Airteagal 26

Dliteanas

Beidh údaráis inniúla na bPáirtithe faoi dhliteanas, i gcomhréir lena gcreataí dlíthiúla faoi seach, i leith aon damáiste a dhéanfar do dhuine mar thoradh ar earráidí dlíthiúla nó

fiorasacha san fhaisnéis a mhalartaítear. Chun dliteanas a sheachaint faoi chreataí dlíthiúla na bPáirtithe lena mbaineann i leith duine aonair díobháilithe, ní fhéadfaidh Eurojust ná údarás inniúla na hAilgéire a phléadáil go raibh faisnéis mhíchruinn aistrithe ag údarás inniúil de chuid an Pháirtí eile. Dá n-íocfadh údarás inniúil cúiteamh le duine aonair mar gheall ar an úsáid a bhain sé as faisnéis mhíchruinn nó mhícheart a fuarthas, rachaidh ionadaithe na bPáirtithe i mbun comhairliúcháin d'fhonn teacht ar réiteach a bheidh inghlactha go frithpháirteach i gcomhréir leis an gComhaontú seo.

Caibidil V

Forálacha críochnaitheacha

Airteagal 27

Costais

Áiritheoidh na Páirtithe go n-iompróidh na húdaráis inniúla a gcostais féin, ar costais iad a thagann chun cinn le linn an Comhaontú seo a chur chun feidhme, mura bhforáiltear a mhalairt sa Chomhaontú seo nó sa socrú oibre.

Airteagal 28

Socrú oibre

Beidh mionsonraí an chomhair idir na Páirtithe chun an Comhaontú seo a chur chun feidhme faoi rialú socrú oibre arna thabhairt i gcrích idir Aireacht Dlí agus Cirt na hAilgéire agus Eurojust i gcomhréir leis an gComhaontú seo.

Airteagal 29

Fógra a thabhairt faoi réamhghníomhaíochtaí chun an Comhaontú a chur chun feidhme

Áiritheoidh gach Páirtí go ndéanfar cóip de na doiciméid a bhaineann leis na coimircí agus na rialacha is infheidhme i réimse na próiseála sonraí, dá dtagraítear in Airteagal 23, a sheoladh/a chur faoi bhráid an Pháirtí eile agus a údaráis maoirseachta.

Airteagal 30

Fógra a thabhairt do na húdaráis mhaoirseachta

Tabharfaidh na Páirtithe fógra dá chéile maidir leis an údarás maoirseachta atá freagrach as maoirseacht a dhéanamh ar chur chun feidhme an Chomhaontaithe seo agus as a áirithiú go gcomhlíonfar an Comhaontú seo i gcomhréir le hAirteagal 21.

Airteagal 31

Teacht i bhfeidhm agus cur i bhfeidhm

1. Déanfaidh na Páirtithe an Comhaontú seo a fhormheas i gcomhréir lena nósanna imeachta inmheánacha féin atá i bhfeidhm.
2. Tiocfaidh an Comhaontú seo i bhfeidhm an chéad lá den dara mí tar éis an dáta dheireanaigh ar a mbeidh fógra tugtha ag ceann den dá Pháirtí dá chéile gur cuireadh na nósanna imeachta dá dtagraítear i mír 1 i gcrích.

3. Beidh feidhm ag an gComhaontú seo ón gcéad lá tar éis an dáta a chomhlíonfar na coinníollacha seo a leanas uile:
 - (d) tá socrú oibre sínithe ag na Páirtithe dá dtagraítear in Airteagal 28;
 - (e) tá fógra tugtha ag na Páirtithe dá chéile faoi na réamhghníomhaíochtaí is gá chun an Comhaontú seo a chur chun feidhme, go háirithe na gníomhaíochtaí sin a leagtar amach in Airteagal 23;agus
 - (f) chuir gach Páirtí in iúl don Pháirtí a thugann fógra go bhfuil an fógra dá dtagraítear i bpointe (b) den mhír seo agus na gníomhaíochtaí a thuairiscítear ann i gcomhréir leis an gComhaontú seo.

Tabharfaidh na Páirtithe fógra i scríbhinn dá chéile lena ndaingneofar comhlíonadh na gcoinníollacha a leagtar amach sa mhír seo.

Airteagal 32

Leasuithe

1. Féadfar leasuithe ar an gComhaontú seo a dhéanamh i scríbhinn tráth ar bith, de chomhthoil idir na Páirtithe. Beidh leasuithe den chineál sin i ndoiciméad ar leith, agus é sínithe go cuí. Is i gcomhréir leis an nós imeachta a leagtar amach in Airteagal 31(1) agus (2) a thiocfaidh siad i bhfeidhm.
2. Féadfaidh na Páirtithe a chomhaontú na hlarscríbhinní a ghabhann leis an gComhaontú seo a thabhairt cothrom le dáta ach nótaí a mhalartú trí bhealaí taidhleoireachta.
3. Má dhéantar aon athrú substaintiúil ar Rialachán Eurojust a dhéanann difear d'fhorálacha an Chomhaontaithe seo, cuirfidh an tAontas an Ailgéir ar an eolas faoi sin laistigh de 2 mhí. Má dhéanann an Ailgéir agóidí bunúsacha i gcoinne raon feidhme leasaithe Rialachán Eurojust, féadfaidh sí an Comhaontú seo a fhoirceannadh i gcomhréir le hAirteagal 35 laistigh de 2 mhí.

Airteagal 33

Athbhreithniú agus meastóireacht

1. Déanfaidh na Páirtithe cur chun feidhme an Chomhaontaithe seo a athbhreithniú go comhpháirteach bliain amháin tar éis an dáta teacht i bhfeidhm, agus go tráthrialta ina dhiaidh sin, agus nuair a iarrann ceachtar Páirtí amhlaidh agus nuair a thagann na Páirtithe ar chomhaontú maidir leis.
2. Déanfaidh na Páirtithe meastóireacht chomhpháirteach ar an gComhaontú seo 4 bliana tar éis a dháta teacht i bhfeidhm.
3. Déanfaidh na Páirtithe cinneadh roimh ré maidir le mionsonraithe an athbhreithnithe agus cuirfidh siad comhdhéanamh a bhfoirne féin in iúl dá chéile. Áireofar ar gach foireann saineolaithe ar chomhar breithiúnach agus ar chosaint sonraí. Faoi réir na ndlíthe is infheidhme, ceanglófar ar na saineolaithe a ghlacfaidh páirt san athbhreithniú imréitigh shlándála iomchuí a bheith acu agus rúndacht na bpléití a urramú. Chun críocha aon athbhreithnithe, cuirfidh gach Páirtí aon fhaisnéis is gá ar fáil don Pháirtí eile, lena n-áirítear trí chumarsáid a dhéanamh le foireann fhreagrach na n-údarás ábhartha a luaitear sa Chomhaontú seo.

Airteagal 34

Réiteach díospóidí agus fionraí

1. Má thagann díospóid chun cinn i ndáil le léiriú, feidhmiú nó cur chun feidhme an Chomhaontaithe seo nó aon ábhar a bhaineann leis, rachaidh na Páirtithe i mbun comhairliúchán agus caibidlíochtaí d'fhonn teacht ar réiteach a bheidh comhaontaithe go frithpháirteach.

I gcás tuairimí éagsúla maidir le léirmhíniú an téacs, is é an leagan Fraincise den téacs an pointe tagartha mar an teanga inar caibidlíodh an Comhaontú seo.

2. D'ainneoin mhír 1, i gcás sárú ábhartha nó neamhchomhlíonadh oibleagáidí faoin gComhaontú seo, nó má tá tasc cruthaithe ann gur dócha go dtarlóidh sárú ábhartha nó neamhchomhlíonadh oibleagáidí den sórt sin nó go bhfuil sé ar tí tarlú, féadfaidh ceachtar Páirtí cur i bhfeidhm an Chomhaontaithe seo a chur ar fionraí, go hiomlán nó go páirteach, trí fhógra i scríbhinn a thabhairt don Pháirtí eile.

Ní thabharfar fógra i scríbhinn den sórt sin go dtí go mbeidh na Páirtithe páirteach i gcomhairliúcháin ar feadh 45 lá gan teacht ar réiteach.

Gabhfaidh éifeacht leis an bhfionraí 30 lá tar éis an dáta a fhaightear an fógra. Féadfaidh an Páirtí a chuirfidh an Comhaontú seo ar fionraí deireadh a chur leis an bhfionraí sin tráth a thabharfar fógra i scríbhinn don Pháirtí eile. Cuirfear deireadh leis an bhfionraí láithreach a luaithe a gheofar an fógra sin.

3. D'ainneoin cur i bhfeidhm an Chomhaontaithe seo a chur ar fionraí, leanfar d'fhaisnéis a thagann faoi raon feidhme an Chomhaontaithe seo agus a aistrítear roimh a fionraí a phróiseáil i gcomhréir leis an gComhaontú seo.
4. Cuirfidh Páirtí aistriú sonraí pearsanta ar atráth i gcás ina scoirfidh an Páirtí eile, agus fad a scoirfidh sé, d'fhoráil a dhéanamh maidir leis na coimircí agus na hoibleagáidí faoi Chaibidil II agus de na coimircí agus na hoibleagáidí sin a chur chun feidhme.

Airteagal 35

Foirceannadh

1. Féadfaidh ceachtar de na Páirtithe an Comhaontú seo a fhoirceannadh. Gabhfaidh éifeacht leis an bhfoirceannadh sin 3 mhí tar éis an dáta a fhaightear an fógra comhfhreagrach i scríbhinn chuig an bPáirtí eile trí bhealaí taidhleoireachta.
2. Maidir le faisnéis a thagann faoi raon feidhme an Chomhaontaithe seo agus a aistrítear sula ndéantar é a fhoirceannadh, leanfar de bheith á próiseáil i gcomhréir leis an gComhaontú seo mar atá i bhfeidhm dáta an fhoirceanta.
3. I gcás ina ndéantar an Comhaontú a fhoirceannadh, tiocfaidh na Páirtithe ar chomhaontú maidir le húsáid leanúnach agus stóráil na faisnéise atá curtha in iúl dá chéile acu cheana. Mura dtagtar ar chomhaontú, tá ceachtar Páirtí i dteideal a éileamh go ndéanfaí an fhaisnéis a chuir sé in iúl a scriosadh nó a thabhairt ar ais dó.

Airteagal 36

Fógraí

1. Seolfar fógraí i gcomhréir leis an gComhaontú seo:

- (a) i gcás na hAilgéire, chuig an Aireacht um Ghnóthaí Eachtracha, um an bPobal Náisiúnta ar an gCoigríoch agus um Ghnóthaí Afracacha;
 - (b) i gcás an Aontais Eorpaigh, chuig an gCoimisiún Eorpach.
2. Féadfar an fhaisnéis faoi sheolaí na bhfógraí dá dtagraítear i mír 1 a nuashonrú trí bhealaí taidhleoireachta.

Airteagal 37
Ceangal le hionstraimí idirnáisiúnta eile

Beidh an Comhaontú seo gan dochar d'fhorálacha aon chomhaontaithe dhéthaobhaigh nó iltaobhaigh maidir le comhar, aon chonradh maidir le cúnaimh dlíthiúil frithpháirteach, aon chomhaontú nó socrú comhair eile, ná aon chaidreamh comhair bhreithiúnaigh ar leibhéal oibre in ábhair choiriúla idir an Ailgéir agus aon Bhallstát, agus ní dhéanfaidh an Comhaontú seo difear ar bith eile dóibh.

Déantar an Comhaontú seo a tharraingt suas i ndúblach san Arabach, sa Bhéarla, sa Bhulgáiris, sa Chróitis, sa Danmhairgis, san Eastóinis, san Fhionlainnis, sa Fhraincis, sa Ghaeilge, sa Ghearmáinis, sa Ghréigis, san Iodáilis, sa Laitvis, sa Liotuáinis, sa Mháltais, san Ollainnis, sa Pholainnis, sa Phortaingéilis, sa Rómáinis, sa tSeicis, sa tSlóivéinis, sa tSlóvaicis, sa Spáinnis, sa tSualainnis agus san Ungáiris, agus comhúdarás ag an téacs i ngach ceann de na teangacha sin.

DÁ FHIANÚ SIN, chuir na Lánchumhachtaigh thíos-sínithe, agus iad údaraithe go cuí chuige sin ag na Páirtithe, a lámh leis an gComhaontú seo.

Arna dhéanamh i/sa, an lá de ... sa bhliain ...

Thar ceann **an Aontais Eorpaigh**

Thar ceann **Dhaon-Phoblacht Dhaonlathach na hAilgéire**

IARSCRÍBHINN I

Saghsanna coireachta tromchúisí (Airteagal 1, pointe (7))

- an sceimhlitheoireacht,
- an choireacht eagraithe,
- gáinneáil ar dhrugaí,
- gníomhaíochtaí sciúrtha airgid,
- an choireacht a bhaineann le substaintí núicléacha agus radaighníomhacha,
- smuigleáil imirceach,
- gáinneáil ar dhaoine,
- an choireacht mhótarfheithicle,
- dúnmharú agus mórdhíobháil choirp,
- trádáil aindleathach in orgáin dhaonna agus fíochán daonna,
- fuadach, srianadh neamhdhleathach agus gabháil giall,
- an ciníochas agus an tseineafóibe,
- robáil agus tromghadaíocht,
- gáinneáil aindleathach ar earraí cultúir, lena n-áirítear seandachtaí agus saothair ealaíne,
- an chaimiléireacht agus an chalaois,
- an choireacht in aghaidh leasanna airgeadais an Aontais,
- trádáil cos istigh agus cúbláil margaidh airgeadais,
- an chambheartaíocht agus sracaireacht,
- góchumadh agus píoráideacht táirgí,
- doiciméid riaracháin a bhrionnú agus gáinneáil orthu,
- brionnú airgid agus modhanna íocaíochta,
- an choireacht ríomhaire,
- an t-éilliú,
- gáinneáil aindleathach ar airm, armlón agus pléascáin,
- gáinneáil aindleathach ar speicis ainmhíocha i mbaol,
- gáinneáil aindleathach ar speicis phlandaí agus cineálacha plandaí i mbaol,
- an choireacht chomhshaoil, lena n-áirítear truailliú ó longa,
- gáinneáil aindleathach ar shubstaintí hormónacha agus ar thionscnóirí fáis eile,
- mí-úsáid ghnéasach agus teacht i dtír gnéasach, lena n-áirítear ábhar mí-úsáide leanaí agus sirtheoireacht páistí chun críoch collaíochta,

- coireanna eile a bhfuil inniúlacht ag Eurojust ina leith.

Déanfaidh údaráis inniúla na hAilgéire na saghsanna coireachta dá dtagraítear san Iarscríbhinn seo a léirmhíniú i gcomhréir le dlí na hAilgéire.

Iarscríbhinn II

Údaráis inniúla na hAilgéire agus a n-inniúlachtaí

(Airteagal 1(3))

Is iad seo a leanas údaráis inniúla na hAilgéire a bhféadfaidh Eurojust sonraí a aistriú chucu:

Údarás	Tuairisc ar na hInniúlachtaí
An Aireacht Dlí agus Cirt	Inniúlachtaí uile údaráis lárnaigh atá freagrach as cúnaimh dlíthiúil frithpháirteach idirnáisiúnta
Cúirteanna (cúirteanna céadchéime) 214 - ionchúisitheoirí poiblí - breithiúna imscrúdaithe - breithiúna cúirte na n-óg - breithiúna (<i>juges de siège</i>)	Ionchúiseamh agus imscrúduithe poiblí
cúirteanna breithiúnacha (cúirteanna achomhairc) 48 - ionchúisitheoirí ginearálta (<i>procureurs généraux</i>) - breithiúna (<i>juges de siège</i>)	Ionchúiseamh agus imscrúduithe poiblí
Cúirteanna speisialaithe: 1- Cúirt choiriúil (atá ann ag gach Cúirt): * cúirt choiriúil chéadchéime * cúirt achomhairc choiriúil 2- Cúirteanna míleata	1 Breithiúnas a thabhairt ag an gcéad chéim agus, ar achomharc, daoine fásta a bhfuil coir curtha ina leith 2 Arna rialú ag an gCód um Cheartas Míleata (<i>code de justice militaire</i>) Dlí Uimh. 18-14 an 29 Iúil 2018 lena leasaítear agus lena bhforlíontar Ordú Uimh. 71-28 an 22 Aibreán 1971

<p>- Aonaid speisialaithe (<i>poles spécialisés</i>):</p> <p>1 An t-aonad náisiúnta coireachta chun sárúithe a bhaineann le teicneolaíochtaí faisnéise agus cumarsáide a chomhrac (<i>pole penal national de lutte contre les infractions liées aux technologies de l'information et de la communication</i>)</p> <p>2 An t-aonad coireachta eacnamaíche agus airgeadais (<i>pole pénal économique et financier</i>)</p> <p>– Cúirteanna dlínse críche níos leithne</p>	<p>1 freagrach as sárúithe a bhaineann le teicneolaíochtaí faisnéise agus cumarsáide agus sárúithe gaolmhara a ionchúiseamh agus a imscrúdú agus as breithiúnas a thabhairt ar na sárúithe sin nuair is cionta iad</p> <p>2 freagrach as sárúithe eacnamaíocha agus airgeadais an-chasta agus sárúithe gaolmhara a bhrath, a imscrúdú, a ionchúiseamh agus breithiúnas a thabhairt orthu</p> <p>Tá inniúlacht chomhpháirteach aige le cúirteanna a bhfuil dlínse chríche níos leithne acu</p> <p>freagrach as sárúithe a bhaineann le gáinneáil ar dhrugaí, coireacht eagraithe thrasnáisiúnta, damáiste do chórais uathphróiseála sonraí, sciúradh airgid agus sceimhlitheoireacht, agus sárúithe ar reachtaíocht malairte eachtraí a ionchúiseamh, a imscrúdú agus a bhreithniú</p>
<p>Comhlachtaí póilíneachta coiriúla: Ard-Stiúrthóireacht um an tSlándáil Náisiúnta (<i>Direction Générale de la Sureté Nationale</i>) – Gendarmerie Nationale – Ard-Stiúrthóireacht um an tSlándáil Inmheánach (<i>Direction Générale de la Sureté Intérieure</i>) – Ard-Stiúrthóireacht um Shlándáil Airm (<i>Direction Centrale de la Sécurité de l'Armée</i>)</p> <p>Gach oifigeach, feidhmeannach agus seirbhíseach a ainmnítear sa Chód um Nós Imeachta Coiriúil nó i ngníomh sonrath</p>	<p>Glacann siad le gearáin agus tuarascálacha, bailíonn siad fianaise agus déanann siad imscrúduithe</p>
<p>An Lároifig um Chomhrac na hÉillitheachta (<i>L'office central de repression de la corruption</i>)</p>	<p>Freagrach as imscrúduithe a dhéanamh ar shárúithe a bhaineann le héilliú</p>

Iarscríbhinn III

Comhlachtaí an Aontais agus údaráis náisiúnta an Aontais lena mbaineann

(Airteagal 1(6))

(a) Comhlachtaí de chuid an Aontais

- An tÚdarás um Fhrithsciúradh Airgid agus um Chomhrac Mhaoiniú na Sceimhlitheoireachta (ÚCSA)
- An Banc Ceannais Eorpach (BCE)
- an Oifig Eorpach Frith-Chalaoise (OLAF)
- an Ghníomhaireacht Eorpach um an nGarda Teorann agus Cósta (FRONTEX)
- Oifig Maoine Intleachtúla an Aontais Eorpaigh (EUIPO)
- Gníomhaireacht an Aontais Eorpaigh i ndáil le Comhar i bhForfheidhmiú an Dlí (Europol)
- Oifig an Ionchúisitheora Phoiblí Eorpaigh (OIPE)

(b) Na húdaráis náisiúnta atá freagrach as imscrúduithe agus ionchúisimh a bhaineann le cionta coiriúla sna Ballstáit lena mbaineann.

IARSCRÍBHINN IV

Comhlachtaí na hAilgéire

(Airteagal 13(1))

- Banc na hAilgéire
- An tAonad um Próiseáil Faisnéise Airgeadais (*cellule de traitement du renseignement financier – CTRF*)
- Ard-Stiúrthóireacht um Chánachas (*direction générale des impôts*)
- An tseirbhís garda cósta náisiúnta (*service national des gardes cotes*)
- Biúró Lárnach Náisiúnta Interpol - Cathair na hAilgéire
- Institiúid Náisiúnta na hAilgéire um Mhaoin Intleachtúil (*Institut National Algérien de propriété industrielle – INAPI*)
- An Oifig Náisiúnta um Chóipcheart agus um Chearta Gaolmhara (*Office National des droits d'auteur et des droits voisins – ONDA*)